

Službene novine Kantona Sarajevo, broj 10/17

Na osnovu člana 64. stav (6) Zakona o državnoj službi u Kantonu Sarajevo ("Službene novine Kantona Sarajevo", broj 31/16) i čl. 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo, na 74. sjednici održanoj 02.03.2017. godine, donijela je

UREDBU

O MEDIJATORIMA DRŽAVNE SLUŽBE U KANTONU SARAJEVO

Član 1. (Predmet regulisanja)

Uredbom o medijatorima državne službe u Kantonu Sarajevo (u daljem tekstu: Uredba) regulišu se kriteriji za izbor medijatora državne službe (u daljem tekstu: Medijator), sadržaj poslova i način rada Medijatora, uslove rada, mandat i druga pitanja od značaja za rad Medijatora.

Član 2. (Kriteriji za izbor Medijatora)

Za Medijatora može biti izabran državni službenik:

- a) koji ima najmanje tri godine radnog staža u organima državne službe odnosno drugim organima i službama na koje se primjenjuje Zakon o državnoj službi u Kantonu Sarajevo (u daljem tekstu: organ državne službe),
- b) koji nije disciplinski kažnjavan i protiv kojeg u vrijeme izbora nije pokrenut disciplinski postupak,
- c) čija je ocjena rada u prethodna dva perioda ocjenjivanja najmanje "uspješan".
- d) koji nije državni službenik iz člana 10. stav (1) tač. a) do e) Zakona o državnoj službi u Kantonu Sarajevo (u daljem tekstu: Zakon).

Član 3. (Poslovi Medijatora)

(1) Medijator državne službe pomaže stranama u sporu postići obostrano prihvatljivo rješenje spora, a posebno:

- a) pomaže u provođenju i poštivanju pravilne primjene i drugih propisa i
- b) djeluje kao posrednik kod rukovodioca organa državne službe i državnog službenika u svim pitanjima koja se odnose na radno-pravni status državnog službenika.

(2) Medijator obavlja posredovanje u rješavanju spora usmenim razgovorom sa sudionicima u sporu, o čemu sačinjava zapisnik, ili davanjem pismenog mišljenja (u daljem tekstu: mišljenje).

(3) U slučaju da državni službenik podnese žalbu na rješenje kojim se rješava pitanje koje se odnosi na njegov radno-pravni status, prije dostavljanja žalbe nadležnom drugostepenom organu, rukovodilac organa državne službe dužan je zatražiti posredovanje Medijatora u rješavanju nastalog spora, odnosno mišljenje Medijatora o mogućnosti i opravdanosti drugačijeg rješenja.

(4) Rukovodilac organa državne službe dužan je s Medijatorom raspraviti i saslušati mišljenje Medijatora u slučaju da se državni službenik i namještenik pismeno obratio Medijatoru zbog toga što Zakon i drugi propisi kojima se reguliše njegov radno-pravni status nisu primijenjeni u odnosu na tog državnog službenika ili nisu pravilno primijenjeni.

(5) Rukovodilac organa državne službe dužan je učestovati u posredovanju i pribaviti mišljenje Medijatora, a na zahtjev sindikata, zbog povrede prava utvrđenih pravilnikom o radu i plaćama organa državne službe, zbog neusaglašenosti sa zakonom i kolektivnim ugovorom.

Član 4. (Pravno dejstvo posredovanja i mišljenja Medijatora)

(1) Posredovanje Medijatora koje se okonča obostrano prihvatljivim rješenjem spora, obavezuje strane u sporu i ima snagu izvršnog rješenja.

(2) Mišljenje medijatora ne obavezuje rukovodioca organa državne službe, ali ga je rukovodilac državne službe dužan zatražiti u slučajevima iz člana 3. ove uredbe, u roku od pet dana od kada je medijacija okončana.

(3) Rukovodilac organa državne službe dužan je dobijeno mišljenje Medijatora priložiti spisu u kojem se rješava o pitanjima radno-pravnog statusa državnog službenika.

Član 5. (Način rada Medijatora)

(1) Medijator postupna na osnovu:

a) žalbe državnog službenika, na koju je rukovodilac državne službe zatražio mišljenje ili mu je žalba neposredno dostavljena od strane državnog službenika sa zahtjevom za posredovanje,

b) pismene predstavke državnog službenika zbog ne primjenjivanja ili nepravilnog primjenjivanja Zakona i drugog propisa kojim se reguliše radno-pravni status državnog službenika,

c) traženja sindikata za posredovanjem i mišljenjem zbog toga što pravilnik o radu i plaćama u organu državne službe nije usklađen sa zakonom i drugim propisima, a prije podnošenja tužbe sudu.

(2) Medijator, prije posredovanja, traži od rukovodioca organa državne službe, odnosno lica koje je podnijelo zahtjev ili sindikata, da mu dostavi dokumentaciju neophodnu za sagledavanje slučaja i posredovanje, nakon čega posreduje između rukovodioca organa državne službe i druge zainteresovane strane, s ciljem da se nastali spor riješi mirnim putem.

(3) U slučaju da se spor ne može riješiti na način predviđen u stavu (2) ovog člana, Medijator svoje pismeno mišljenje dostavlja rukovodiocu organa državne službe i drugoj zainteresovanoj strani.

(4) Medijator je dužan postupati odmah po prijemu zahtjeva, vodeći računa o rokovima koji obavezuju u aktima povodom kojih posreduje ili na koje daje mišljenje.

(5) Medijator postupa u skladu sa Zakonom, kojim su utvrđena prava i obaveze državnog službenika, a posebno načelima utvrđenim Etičkim kodeksom za državne službenike, u odnosu na rukovodioca organa državne službe, kao i državne službenike i sindikat, kao podnosioca zahtjeva.

Član 6. (Uslovi rada Medijatora)

(1) Medijator svoje dužnosti iz člana 3. ove uredbe obavlja u radnom vremenu, a izuzetno, ukoliko rukovodilac organa državne službe nije u mogućnosti da se posredovanje obavi u radnom vremenu, obavlja ih izvan radnog vremena.

(2) Rukovodilac organa državne službe ne može Medijatora, zbog njegovog mišljenja ili posredovanja, staviti u nepovoljniji položaj u odnosu na druge državne službenike ili pokrenuti disciplinski postupak zbog njegovih stavova u postupku posredovanja, a u odnosu na poslove njegovog radnog mjesta uvažava dodatni angažman državnog službenika u svojstvu Medijatora.

Član 7. (Zapisnik i izvještaj o radu Medijatora)

(1) O postupcima posredovanja Medijator vodi zapisnik, koji potpisuju Medijator i učesnici u postupku posredovanja.

(2) Medijator je dužan o postupcima posredovanja i davanja mišljenja voditi evidenciju, hronološkim redom pristiglih zahtjeva za posredovanjem ili davanjem mišljenja, koja sadrži podatke o datumu i sadržaju svih zahtjeva podnesenih Medijatoru, datumu i rezultatima posredovanja, datumu dostavljanja mišljenja, kao i efektima postupka posredovanja i datih mišljenja.

(3) Medijator podnosi godišnji izvještaj o radu Ministarstvu pravde i uprave Kantona Sarajevo (u daljem tekstu: Ministarstvo pravde), gradonačelniku Grada Sarajeva (u daljem tekstu: Gradonačelnik), odnosno načelniku općine na teritoriji Kantona Sarajevo (u daljem tekstu: načelnik), radi praćenja primjene zakona i drugih propisa koji se odnose na radno-pravni status državnih službenika i predlaganja mjera za unapređenje stanja u državnoj službi, kao i sindikatu.

(4) Za poslove posredovanja i davanja mišljenja Medijator ima pravo na naknadu, u visini naknade

člana Disciplinske komisije, samo u onom mjesecu u kojem je proveo postupak medijacije, a naknada se isplaćuje na teret organa državne službe za koji je Medijator izabran.

Član 8. (Način izbora Medijatora)

- (1) Svi zaposlenici organa državne službe, u saradnji sa sindikatom, biraju na mjesto medijatora državne službe jednog državnog službenika.
- (2) Ukoliko se bira zajednički Medijator za dva ili više organa državne službe, o izboru Medijatora odlučuju svi zaposlenici tih organa državne službe.
- (3) Izbor Medijatora vrši se javnim glasanjem zaposlenika organa državne službe.
- (4) U slučaju da više državnih službenika dobije isti broj glasova, vrši se ponovno glasanje, putem glasačkih listića.
- (5) Ukoliko ni poslije glasanja provedenog u skladu sa stavom (4) ovog člana ne bude izabran Medijator, postupak za izbor ponavlja se na osnovu ponovnog prijedloga kandidata, najkasnije u roku od 30 dana od dana neuspjelog izbora Medijatora.
- (6) Državni službenik je izabran za Medijatora ako za njegov izbor glasa većina zaposlenika u svakom od organa državne službe koji ga biraju.

Član 9. (Podnošenje prijedloga za izbor Medijatora)

- (1) Prijedlog za izbor Medijatora može podnijeti svaki zaposlenik, sindikat i državni službenik koji želi da bude izabran za Medijatora.
- (2) Uz prijedlog iz stava (1) ovog člana, predlagač prilaže dokaze o ispunjavanju kriterija iz člana 2. ove uredbe.

Član 10. (Organizovanje i provođenje izbora Medijatora)

- (1) U organu državne službe, državni službenici i predstavnici sindikata utvrđuju listu kandidata koji ispunjavaju kriterije za izbor, te organizuju provođenje izbora Medijatora.
- (2) O postupku utvrđivanja liste kandidata i provođenju izbora iz stava (1) ovog člana vodi se zapisnik, u kojem se obrazlaže zašto određeni kandidati nisu uvršteni na listu kandidata za izbor, broj državnih službenika koji su glasali, način na koji se glasalo, broj utvrđenih glasova za svakog kandidata i koji je kandidat izabran za Medijatora.
- (3) Izbor Medijatora može se izvršiti i u slučaju samo jednog kandidata koji ispunjava kriterije za izbor, ukoliko taj kandidat prilikom glasanja dobije većinu glasova državnih službenika koji su glasali.

(4) Nakon završenog glasanja predviđenog u članu 8. st. (2) i (4) ove uredbe, objavljuju se rezultati glasanja, a pismena odluka o izabranom Medijatoru, koja je konačna, dostavlja se Agenciji za državnu službu Federacije Bosne i Hercegovine (u daljem tekstu: Agencija), radi potvrđivanja izbora Medijatora.

(5) Nakon potvrđivanja izbora Medijatora, Odluka i potvrda Odluke dostavlja se Ministarstvu pravde, Gradonačelniku, odnosno načelniku.

(6) Zapisnik iz stava (3) ovog člana i Odluku o izboru Medijatora potpisuje državni službenik koji je vodio izbore i predstavnik sindikata.

(7) Zapisnik i Odluku iz stava (6) ovog člana, rukovodilac organa državne službe za koji je izabran Medijator dostavlja Agenciji radi potvrđivanja izbora Medijatora, a u slučaju da je Medijator izabran za više organa državne službe, zapisnik i Odluku iz stava (6) ovog člana dostavlja Agenciji jedan od rukovodilaca organa državne službe za koji je Medijator izabran.

Član 11. (Oglašavanje Izbora)

(1) Radi provođenja izbora Medijatora, na oglasnoj tabli organa državne službe oglašava se dan, vrijeme i mjesto izbora Medijatora, najkasnije 5 dana prije dana izbora.

(2) Rukovodilac organa državne službe dužan je omogućiti državnim službenicima da obave glasanje i staviti na raspolaganje odgovarajuću prostoriju organa državne službe za potrebe izbora, u trajanju od najviše dva sata u toku radnog vremena.

Član 12. (Mandat medijatora)

(1) Mandat medijatora je dvije godine od dana izbora.

(2) Državni službenik može biti ponovo izabran za medijatora, bez ograničenja.

Član 13. (Razrješenje Medijatora)

(1) Medijator može biti razriješen dužnosti:

a) u slučaju da protiv Medijatora bude pokrenut disciplinski postupak zbog povrede službene dužnosti ili krivični postupak kojim se narušava ugled Medijatora i organa državne službe,

b) u slučaju prestanka rada u organu državne službe u kojem je izabran za Medijatora,

c) u slučaju spriječenosti za rad duže od dva mjeseca,

d) u slučaju da poslove Medijatora ne obavlja na način propisan ovom uredbom,

e) na vlastiti zahtjev,

f) u drugim slučajevima u kojima je onemogućen da obavlja dužnost Medijatora, zbog odsustvovanja s rada u periodu dužem od dva mjeseca.

(2) Medijator se razrješava većinom glasova svih državnih službenika organa državne službe, kad nastane slučaj iz stava (1) ovog člana, a na prijedlog sindikata ili najstarijeg državnog službenika u organu ili organima državne službe, koji sazivaju državne službenike radi javnog glasanja o razrješenju Medijatora.

(3) Odluka o razrješenju dužnosti Medijatora je konačna i dostavlja se Agenciji i Ministarstvu pravde, Gradonačelniku, odnosno načelniku.

Član 14. (Ponovni izbor Medijatora)

Postupak izbora Medijatora na način propisan ovom uredbom, u slučaju isteka mandata, pokreće se najkasnije 15 dana prije isteka mandata Medijatora, a u slučaju razrješenja Medijatora, obavlja se najkasnije u roku od 15 dana od dana razrješenja, o čemu se brine sindikat ili najstariji državni službenik u organu ili organima državne službe, ako biraju zajedničkog medijatora.

Član 15. (Primjena Uredbe na namještenike)

U skladu sa članom 17. Zakona o namještenicima u organima državne službe u Federaciji Bosne i Hercegovine ("Službene novine Federacije BiH", broj 49/05), Medijator izabran u skladu s odredbama ove uredbe, djeluje kao posrednik u svim pitanjima koja se odnose na radno-pravni status namještenika.

Član 16. (Rok za izbor Medijatora)

Izbor medijatora, u skladu sa Zakonom i ovom uredbom, izvršiće se u roku od dva mjeseca od stupanja na snagu ove uredbe, kada prestaje dužnost i mandat dotadašnjeg Medijatora.

Član 17. (Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-9462-22/17
02. marta 2017. godine
Sarajevo

Premijer
Elmedin Konaković, s. r.